

खास-खास खबरां:-

- प्रधानमंत्री नरेन्द्र मोदी होर अज्ज दक्खन भारत प्राकृतिक राई-बाई शिखर सम्मेलन दा उदघाटन करंगन ते पी.एम. किसान योजना दी 21मीं किस्त बी जारी करंगन।
- बिहार च एन.डी.ए दे नमें चुने गेदे विधायक अज्ज पटना च मिलियै अपने नेता गी चुनंगन।
- ई.डी नै मनी-लॉडरिंग रोकथाम कनून तैहत AI- Fatah समूह दे चेयरमैन गी गिरफ्तार कीता।
- विदेशमंत्री एस. जयशंकर होरें आखेया जे भारत गी आतंकवाद दे खलाफ अपने लोकें दा बचाव करने दा अधिकार ऐ ते ओह इसदा इस्तमाल करंगन।
- ते क्रिकेट च भारत-ए ओमान उप्पर 6 विकेटें दी जित्त कन्नै राईजिंग स्टॉर एशिया कप -2025 दे सैमीफाईनल च दाखल होई गेया ऐ।



### PM-AP Visit

प्रधानमंत्री नरेन्द्र मोदी होर अज्ज आंध्र प्रदेश दे इक दिन दे दौरे पर जांगन। ओह पुट्टपर्थी च भगवान श्री सत्य साई बाबा हुंदे शताब्दी समारोह च हिस्सा लैडन। इस दरान प्रधानमंत्री भगवान श्री सत्य साई बाबा हुंदे पवित्र मंदर ते महासमाधि पर पूजा-अर्चना करडन। शताब्दी बरे दे सरबंधै च मोदी होर बाबा हुंदे जीवन, सिक्खेआएं ते उंदी विरासत गी समर्पित इक यादगारी सिक्का ते डाक टिकटें दा इक सेट जारी करडन। कार्यक्रम दरान प्रधानमंत्री होर उत्थे मौजूद लोकें गी संबोधि बी करंगन। मगरा प्रधानमंत्री होर तमिलनाडू दे कोडम्बटूर जांगन- जित्थे ओह दक्खन भारत प्राकृतिक राई-बाई शिखर सम्मेलन दा उदघाटन करंगन। इस दरान प्रधानमंत्री होर पी.एम किसान योजना दी 21मीं किस्त बी जारी करडन।



### Bihar-NDA

बिहार च एन.डी.ए दे नमें चुनोए दे विधायक अज्ज पटना च अपने नेता गी चुनने आस्तै बैठक करंगन। 5 भ्याल दलें भाजपा, नजता दल युनाइटेड, लोक जनशक्ति पार्टी (रामविलास) हिंदुसतानी अवाम मोर्चा ते राष्ट्री लोक मोर्चा दे 202 एनडीए विधायक इस बैठक च हिस्सा लैडन। मुख्मंत्री नितीश कुमार हुंदे बिहार च इक बारी परतिए एन.डी.ए विधायक दल दे चुने जाने दी मेद ऐ। मगरा एन.डी.ए विधायक दल दा नेता राज्य च नमी सरकार बनाने दा दावा पेश करोग।



### ED -AI Fatah Chairman

प्रवर्तन निदेशालय नै अल-फताह समूह दे चेयरमैन Jawad Ahmed Siddiqui गी Money Laundering रोकथाम कनून तैहत गिरफ्तार कीता ऐ। एह गिरफ्तारी जारी जांच च अल-फताह समूह दे परिसर च कीती गेदी तलाशी कारवाई दरान इकट्टे कीते गेदे सबूतें दी विस्तृत जांच दे मगरा कीती गेई ऐ। कल E.D. नै दिल्ली च 19 थाहरें पर तलाशी अभियान चलाया- जिंदे च अल-फताह युनिवर्सिटी दे परिसर ते अल- फताह समूह दे मुख् लोकें दे रिहायशी थाहर बी शामिल हे।



### PM -Nikolameet

प्रधानमंत्री नरेन्द्र मोदी होरें आखेया ऐ जे ओह अगले महीने रुस दे राष्ट्रपति ब्लादिमीर पुतिन हुंदी मेजबानी लेई उत्सुक न। एह ब्यान रुस दे राष्ट्रपति दे सहायक निकोलाई पात्रुशेव हुंदे कन्नै कल नमीं दिल्ली च उन्दे कन्नै होई दी मुलाकात दरान आया हा। प्रधानमंत्री होरें अपनी इक सोशल मीडिया पोस्ट च आखेया ज उनें पात्रुशेव कन्नै समुन्द्री क्षेत्र च सहयोग बधाने- संचार- कौशल विकास-जहाजें दे निर्माण ते समुन्द्री अर्थवस्था च सहयोग दे नमें मौके पर चर्चा कीती।



## Goyal TIA Portal

उद्योग ते बपार मंत्री पीयूष गोयल होरें कल नमीं दिल्ली च ट्रेड इन्टेलिजेंस ते Analytics TIA पोर्टल दी शुरुआत कीती। एह पोर्टल इक लागत प्रभावी ते ओपन सोर्स हल ऐ। एह पोर्टल 28 थमां मते डैशबोर्ड पर 270 थमां मते Interactive Visualisations प्रदान करदा ऐ। इस मौके पर बोलदे होई गोयल होरें आखेया जे सरबंधी धडे दे फैसले लैने च मदद करने आस्तै व्यवसाय गी बपार डेटा दे कन्नै मता पारदर्शी होने दी लोड ऐ। उनें आखेया जे एह पोर्टल आयातकें-निर्यातकें- स्टार्ट-अप ते भलेयां लौहके-लौहके ते मध्य दर्जे दे उद्यमें आस्तै नमें विचार प्रदान करोग।



## Bangladesh NSA –India Visit

बांगलादेश दे राष्ट्री सुरक्षा सलाहकार खलीलूर रहमान होर अज्ज दंडु दिनें दे दौरै लेई नमीं दिल्ली आंगन। रहमान होर भारत दे एन.एस.ए अजीत डोवाल हुंदे सादे उप्पर भारत दे दौरै उप्पर आ करदे न- तां जे ओह 19-20 नवम्बर गी होने आहली कोलम्बो सुरक्षा सम्मेलन (सी.एस.सी.) दी सतमी बैठक च शामिल होई सकन। 4 अप्रैल गी Bangkok च BIMSTEC शिखर दे मगरा उंदी डोवाल हुंदे कन्नै बी दबक्खी बैठक होने दी मेद ऐ।



## Jaishankar-SCO

विदेश मंत्री डॉ. एस जयशंकर होरें आखेआ ऐ जे दुनिया गी आतंकवाद दे सारे स्वरूपें ते अभिव्यक्तिएं प्रति दना बी नेई बर्दाश्त करने आहली नीति अपनाती लोडचदी। रूस दे मैस्को च शहंगाई सहयोग संगठन-एस.सी.ओ दे शासनाध्यक्षे दी परिषद दी बैठक गी संबोधित करदे होई जयशंकर होरें आखेआ जे हाल दे बरे च आतंकवाद, अलगाववाद ते उग्रवाद दी स्थिति बदत्तर होई ऐ ते इनें खतरें गी अनदिक्खा नेई कीता जाई सकदा। उनें आखेया जे भारत गी पूरा अधिकार ऐ जे ओ आतंकवाद खिलाफ लड़ाई च अपने लोकें दी रक्षा करै। विदेश मंत्री होरें आखेआ जे जलवायु बदलाव, महामारिएं ते लड़ाई कन्नै भरोचे दे मौजूदा समें च मानवीय सहयोग बड़ा महत्वपूर्ण ऐ। उनें आखेआ जे इक सभ्य राष्ट्र दे तौर पर भारत दा मजबूत विश्वास ऐ जे लोकें बश्कार आपसी आदान-प्रदान कुसै बी ईमानदार सरबंध दा मूल तत्व ऐ।



## MEA Saudi Arabia

विदेश मंत्रालय नै आखेया ऐ जे इस महीने दी 17 तरीक गी मदीना च भारतीय तीर्थ-यात्रियें कन्नै जुडी दी दुखद घटना दे मगरा अज्ज आंध्र-प्रदेश दे राज्यपाल जस्टिस S. Abdul Nazeer हुंदी अगुआई च भारत दा इक उच्च स्तरीय प्रतिनिधिमंडल सऊदी अरब दा दौरा लाग। एह प्रतिनिधिमंडल हज ते उमरा मंत्रालय सने सऊदी दे अधिकारियें कन्नै तालमेल बनाइयै पूरी चाल्ली मदद करोग। मंत्रालय नै जानकारी दिती ऐ जे रियाद च भारतीय दूतावास ते जेद्दाह च Consulate General of India-मकामी अधिकारियें कन्नै रलियै अवशेशें दी पंछान च तेजी आहने लेई कम्म करा रदा ऐ।



## India –Colombo Security Conclave

भारत बुधवार ते वीरवार नमीं दिल्ली च पैहली बारी राष्ट्रीय सुरक्षा सलाहकार एन.एस.ए हुंदी अगुआई च कोलंबो सुरक्षा सम्मेलन दी मेजबानी करोग। इसदा मकसद हिंद महासागर क्षेत्र च इक व्यापक सुरक्षा प्रदाता दे तौर पर अपनी भूमिका गी मजबूत करना ऐ। कोलंबो सुरक्षा सम्मेलन च भारत-श्रीलंका-मालदीप-मॉरीशस ते बांगलादेश शामिल ना। Seychelles इस सम्मेलन दा पर्यवेक्षक मुख् ऐ ते मगरा ओमान ते म्यांमार गी बी कोलंबो सुरक्षा सम्मेलन च शामिल करने दी योजना ऐ।



## India –Codex Committee

48में Cedex Alimentarius कमीशनर CAC-48 च एशिया क्षेत्र आस्तै Codex कार्यकारी समीति च भारत गी परतियै चुनी लैता गया ऐ। सेहत ते परोआर कल्याण मंत्रालय नै आखेया जे रोम च आयोजित सत्र च भारतीय प्रतिनिधिमंडल दी अगुआई भारतीय खाद्य सुरक्षा ते मानक प्राधिकरण दे मुख्ब कारजकारी अधिकारी होरें कीती। भारत नै खाने-पीने आहली चीजें च इस्तेमाल होने आहले पदार्थ-कीटनाशक- पशु चिकित्सा च इस्तेमाल होने आहली दोआइयें ते खाद्य पदार्थ कन्नै सरबंधी डोटाबेस दे नवीनीकरण ते विकसित करने पर ध्यान दिता ऐ।



## IFFI

भारत दा 56मां अंतराष्ट्रीय फिल्म महोत्सव 2025 कल भारत दे सिनेमा दी विरासत दी इक जीवंत सांस्कृतिक परेड कन्नै शुरु होग। एह महोत्वस इस महीने 20 थमां 28 तक्कर गोआ दे पणजी च होग- जेहदे च 80 मते मुख्बे दे मेहमान ते फिल्म निर्मातां शिरकत करगंन ते इस महोत्वस च भारत ते विदेशें थमां 270 शा मती फिल्में दा प्रदर्शन कीता जाग।



## Cricket

भारत-ए नै कल राती ओमान गी 6 विकट कन्नै हराइयै क्रिकेट दे Rising Stars Asia Cup 2025 दे सैमीफाईनल च अपनी थाहर पक्की करी लैती ऐ। पैहले गेंदबाजी दा फैसला करदे होई भारतीय टीम नै ओमान गी 20 ओवरें च 7 विकटें पर 135 रन्ज पर रोकी दिता। परते च भारत –ए नै एह लक्ष्य 17 ओवर 5 गेदें च 4 विकटां मुहाइयै 138 रन्ज बनाइयै हासिल करी लैता। हुन शुक्रवार गी होने आहले सैमीफाईनल च भारत दा मुकाबला ग्रुप-ए दी शीर्ष टीम कन्नै होग।

